

INUIT ATAQATIGIIT INATSISARTUNI



UPA2022/075

Maajip 10-at 2022

Mariia Simonsen

Inatsisartut aalajangiiffigisassaattut siunnersuut, Naalakkersuisut peqquneqassasut suleqatigiissitamik pilersitsissasut Kalaallit Nunaanni filmiliortartut silarsuaata qanoq nukittorsarsinnaananeranut innersuussuteqartussanik. Naalakkersuisut sapinggisaq tamaat suleqatigiissitami attuumassuteqartut peqataatissavaat. Siunnersuutit UPA 2023-mi saqqummiunneqassapput.

(Inatsisartunut ilaasortaq Nivi Olsen, Demokraatit)

Nunatsinni filmiliortarnerup nukittorsarneqarnissaa siunertaralugu suleqatigiissitanik innersuussuteqartussanik pilersitsisoqarnissaanik Nivi Olsenip Demokraatineersup suliaqaqqusinera Inuit Ataqatigiinnit taparserparput.

Nunatsinni filmiliornermik inuussutissarsiuteqarneq arriikkaluamik siuariartorpoq, ukiunili tulliuttuni periarfissat amerlinissaat neriunaateqarpoq, tassami nunatsinni filmiliat alutorineqarlutillu soqutigineqartarput, nunanullu allanut siammarterneqaraangamik piumaneqartaqalutik. Piffissami qaangiuttumi akuttunngitsunik saqqummertarput filmilianut isiginnaagassianulluunniit kalaallinik inuttassarsiortut, tamannalu inuussutissarsiutigineqarsinnaalersimammat siunissamut isumalluarnarpoq.

Tamanna, filmiiallu kalaallinit suliarineqartut amerliartorusaarnerat, minnerunngitsumillu nersualaarneqarlutillu alutorsaatigineqartarnerat filmiliornerup siunissaanut neriulluarnermik pilersitsipput.

INUIT ATAQATIGIIT INATSIARTUNI



Naalakkersuisup taakkartugaatut filmiliornermut aningaasaliisussarsiorneq periarfissarissaarnerulersimavoq, sulilu periarfissat amerlanerulissasut Inuit Ataqatigiinni qularutiginnilarput.

Taamaattoq filmiliornermik suliaqartut arlaleriarlutik tikkuartarpaat filmiliornermut atugassarititaasut periarfissarititaasullu suli siuarsartarialerujussuusut. Kissaatigineqartunut ilaavoq filminstituttimik pilersitsisoqarnissaa, taamaalilluni filmiornermik ilinniarneq filmilianillu ilisimatusarneq periarfissaqalissammata.

Suleqatigiissitamik siunnersuusiortussamik pilersitsisoqarnissaanik Demokraatinit siunnersuutigineqartoq Inuit Ataqatigiinnit tamakkiisumik ilalerparput, tassami filmiliorneq filmilianillu kalaallinit nunatsinnilu nunaqartunit allanit suliarineqartut kikkuunitsinnik silarsuarmillu isiginnittaaseqarnitsinnik takutsisisuupput ilumoortut – allamiut isaannit isiginninnerunngitsut. Inuiattut kinaassutsitsinnut tamakku pingaaruteqartorujussuupput. Demokraatit aamma isumaqatigaavut filmiliornermut tapiissuteqartarneq iluarsaattariaqartoq, aningaasaliinissamullu periarfissat pitsaanerusariaqartut.

Nunatsinni isiginnaartitsisarfeqarnerup isiginnaartitsisartunillu ilinniarfeqalerneratulli kulturitsinnik takusassiortartutut filmiliornermut pitsaasunik atugassaqartinneqarnissaat Inuit Ataqatigiinni pingaartipparput, suleqatigiissitallu siunnersuutaasa saqqummiunneqarnissaat qilanaaraarput.

Taama oqaaseqarluta siunnersuut ataatsimiititaliamut susassaqartumut innersuupparput.